

明史稿
衡云山人集

明文稿
衡岳山人集

原例

昔吾友萬子季野方輯明史語余曰鼎革之際事變繁多金陵閩粵播遷三所厯年二十遺事零落子盍輯而志之余曰是明史之所賅也余何事爲萬子曰不然明史以福唐魯桂附入懷宗紀載寥寥遺缺者多倘專取三朝成一外史及今故老猶存遺文尙在可網羅也逡巡數十年遺者盡矣野史無刊本日漸零落後之人有舉隆永之號而茫然者矣我儕可聽之乎余曰是則然矣其間固有抗顏逆行伏尸都市

非令甲之罪人乎取之似涉忌諱刪之則曷以成書
萬子曰不然國家興廢何代無之亦各爲其主凡在
興朝必不惡也不得已而遂其志爾

本朝初定鼎首褒殉難諸臣以示激揚其在外者或
未暇及褒與諫可竝行也今且方開明史局已奉有
各種野史悉行送部不必忌諱爲嫌之令矣採而輯
之庸何傷余固曰諾然世事拘牽因循未果其後錄
得野史數十種方欲咨訪發凡起例而萬子溘然先
逝明史列傳甫脫稿尙未訂正也念亡友惓惓之言

不忍違其雅意閒居京邸放廢無事薈叢諸書以消
永日顏曰南疆佚史非敢附名山之藏亦賢於博奕
云爾

野史中有兼紀三朝事者吳偉業綏寇紀畧鄒漪明
季遺聞是也有紀國變及南渡事者夏允彝幸存錄
文秉甲乙事案許重熙甲乙彙畧李清三垣筆記是
也有專紀卯兇事者顧炎武聖安本紀黃宗羲卯兇
實錄李清南渡錄是也有兼紀卯永兩朝事者黃宗
羲行朝錄錢謙益所知錄瞿昌文天南逸史劉湘客

行在陽秋是也有專紀隆武者閩人思文大紀是也
專紀永麻事者沈佳存信編魯可藻嶺表紀年劉湘
客楊在綦母遂象郡紀事馮甦劫灰錄某南粵新書
粵紀事畧鄧凱滇緬紀聞滇緬日記是也有專紀一
人一事者應廷吉清憐屑史得威維揚殉節始末袁
繼咸潯江紀事某北使記康范生處事始末某贛州
乙丙紀畧徐世溥江變紀畧章曠楚事紀畧沈荀蔚
蜀難叙畧楊在朱容藩亂蜀始末武岡播遷始末孫
可望晉王始末犯闕始末安隆紀事鄧凱遺忠錄求

野錄也是錄是也有專紀魯監國事者黃宗羲魯紀
年四明山寨記舟山興廢記日本乞師記馮京第浮
海記鮑澤甲子紀畧陳睿思閩海見聞紀畧是也共
四十餘種其間紀載有詳畧年月有先後是非有異
同毀譽有彼此取萬子季野明未諸傳及徐閣學明
季忠烈紀實諸傳合而訂之正其錯繆刪其繁蕪補
其所闕撰其未備以成是編其他未見之書尙俟再
考然大畧具是矣

一古史於帝皇則稱本紀諸臣則稱列傳者紀舉一

時政令大綱列傳止載一人一事故稱紀以別之
然太史公於項羽亦稱本紀以其號令一時事多
詳載也今金陵閩粵位雖不終亦自王其地各有
政教理合紀載若拘附入懷宗之例則傳且不列
何有於紀非一代史體也茲首卷先紀畧不稱本
紀者統于

本朝也其言畧者事固不得而詳也

一古人作史有專傳有合傳有附傳非以人有優劣
也事有煩簡耳專傳必其行跡之衆多者也合傳

則其學同其行同其官同其時同其名同其一事
偶同老莊孟荀其學同也刺客遊俠酷吏其行同
也張蒼申屠嘉其官同也婁敬叔孫通其時同也
管嬰晏嬰其名同也屈原賈誼以放逐一事偶同
也至附傳者以其人事跡少不能成傳故附記之
非薄其人也是編諸傳竊倣其意以事以時爲類
或其人品相懸亦不及計耳

一諸臣有逮事崇禎者其行事奏章悉畧之以所重
在南渡後且已載于明史也必列之者以其終事

在後也然大節亦撮數語不敢盡遺也

一諸傳之序先金陵次閩次浙東次粵諸臣有歷事
三朝者則從其重者次之呂大器終于粵而先之
者迎主異議大器爲主一朝之眉目也其後事亦
無所表見

一古人附傳例不列名余獨不然蓋惜其人忠義節
烈本屬賢者而行事泯沒無可紀載僅以一死成
名若復不列其姓氏則觀者且將忽之故每篇大
書特書令人聳然於賢者之名耳若其人本不足

重者雖附載不列名也

一徐閣學忠烈紀實雖其人無事可書者必另列一行大書姓名余則不然彼專紀忠烈無可附書余則一朝之人忠佞賢奸悉列焉間或附見豈能掩其人之忠烈哉此所以異也無行事而但列姓名以爲一傳古無此體也

一義士義兵等傳古無其名今無妨乎曰無害也夷齊叩馬而太公稱其義士出自興朝佐命之口非出自勝國也况諸史各有忠義傳在勝國者爲忠

則在興朝爲不忠在勝國者爲義則在興朝爲不義然史皆興朝所修而必不廢忠義之名者存其實焉耳此之立名猶是義也

一或謂黃陶庵學淳文高明史置之儒學侯通政沈總督邱巡撫揭傳兩太史曾吏部等皆官位尊重乃與方都司茹參將等武夫並列義兵其間更有布衣仗義者俱在焉得毋不倫乎余曰固者子之見也夫名位有貴賤忠義無貴賤也能忠義則匹夫貴矣不能忠義則卿相賤矣漢人所謂桀紂至

貴而下士羞與爲伍夷齊至賤而王公不敢與抗
是也豈在名位哉哀公十一年郊之戰公叔務人
與其嬖童汪錡乘皆外魯人欲勿殤汪錡問於仲
尼仲尼曰能執干戈以衛社稷可無殤也夫童子
也而其名與國君之子並垂魯人禮之聖人賢之
千載下凜凜有生氣較之魯三卿更烈焉非以其
成義耶而何不可並列之有至如道學正於舍生
取義見之陶庵以一書生枕干寢戈與武夫並奮
此正見其實在道學也與夫口談仁義而身怯國

事者異矣嗟乎世衰道微學術不明人惟聲利是趨乃于綱常大義亦先尙名位豈不可歎哉

一周鑣周鍾雷演祚三人者未嘗官南渡也南渡殺之耳何傳焉曰是南渡一大案也馬士英竭智盡力以起阮大鍼而歸其獄于從逆諸臣從逆者不可得而誅而歸其獄于周雷于是周雷誅大鍼用清流懼禍釀成左鎮之內犯而國以亾則此三人者烏乎不載也

一四鎮同功一體之人也列黃高而削二劉以其不

終也其事則已附見矣李成棟之事見于李元胤傳以其無始也成棟不與聲桓一例乎曰是有辨粵中之不靖成棟擾之也迨其反正而民生已塗炭矣忠烈材幹之士已夷滅矣惟其小心聽命以次勤事較之借內附而仍暴橫如忠貞諸人異焉若夫聲桓始終一賊耳歸朝之後不請吏不納土不離窟穴擅置官吏私財賦妄殺戮稽其後來全無王章致煩天討故列逆臣

一孫可望事與粵相終始粵中立國而可望入滇矣

可望降而粵亦以亾且其邀王封謀受禪擅殺大臣切置安隆稱兵內犯皆粵事之大者不載不可也載之則人已歸降例不得載今詳見於李定國傳而雜見於同時諸臣亦得大畧矣

一諸史必有儒學孝友獨行文苑隱逸方伎等傳茲編爲人無幾無從分晰獨隱逸欲列一傳而搜訪殊寡方明之末諸潔身高蹈者所在多有然其人既不求名而知交中或鮮好義文學之士不爲傳述子孫式微遂致湮沒豈不惜哉廣搜旁羅以發

潛德此亦四方君子之責也

一金陵之亾閩有君矣閩亾粵有君矣魯監國紀不
亦贅乎曰此以存諸遺臣也諸臣之雜事唐魯桂
者多矣若錢張諸公與魯相終始者也無魯何有
諸臣以諸臣之雄才大畧精忠烈志皆與日月爭
光者可以畧乎諸臣不得畧而監國烏乎不紀也
且閩亾之後諸臣奉之長垣奉之健跳奉之中左
奉之舟山閩中震動獨非國事乎此皆不得附見
于閩粵者也在昔梁未亾而蕭譽自立稱爲後梁